


Comandante saliente di Marina Real Edwin Hofma tabatin palabranan bunita pa gobierno y pa comunidad di Aruba

“Semper mi por a conta cu sosten y envolvimiento di gobierno”

ORANJESTAD(AAN): Edwin Hofma. E ceremonia di traspaso di mando a tuma luga diabierna anochi na Marinierskazerne den presencia di Gobernador di Aruba Fredis Refunjol, Prome Minister Eman, miembronan di Parlamento y



otro dignatarionan.

Hofma ta mira back riba su periodo na Aruba como uno cu ta worde caracteriza pa envolvimento grandi. “Envolvimento di gobierno di Aruba mi ta considera como un factor di exito pa resultado”, Hofma a bisa den su discurso di despedida. El a bisa cu el a sinti envolvimento di gobierno di Aruba ora cu net el a cuminsa den su funcion nobo na momento cu e teremoto a tuma luga na Haiti na cuminsamento di 2010 y e peticion pa ayudo a drenta. “Prome Minister Mike Eman a yama mi mesora pa hunto bin cu un accion di yudansa for di Aruba pa Haiti. E bapor di Marina Pelikaan a pasa na waf di Oranjestad pa busca mercancia cu a worde treci eynan den pura. Ministernan tabata presente pa brinda nan sosten na e marinierman, entre nan miembronan di Arumil”. Durante comando di Hofma e menaza di ciere di Marinierskazerne na Savaneta a bin dilanti. “Un bes mas e envolvimento di gobierno di Aruba tabata evidente. Schouder cu schouder nos a para duro pa Marinierskazerne Savaneta por a keda. Nos tabata exitoso, pasobra no mucho tempo despues Minister Hans Hillen, kende tabata minister di Defensa e tempo ey, a anuncia cu Marinierskazerne Savaneta ta keda habri”. Hofma a papia tambe di un accidente serio na luna di maart aña pasa na unda dos marinier hoben a perde nan bida. “Den e periodo tristo ey tambe nos a sinti e sosten caluroso di

gobierno di Aruba”. Pero e envolvimento mas fuerte y profundo cu Hofma a sinti for di gobierno y comunidad di Aruba ta ehecuracion di e proyecto Formacion Social den cual Marinierskazerne y milicia Arubano ta involvi. “Gobierno di Aruba hunto cu Ministerio di Asuntonan Exterior y Relacionnan di Reino a inicia e proyecto aki pa ofrece hobennan un di dos oportunidad den bida pa un bon start den comunidad. Mi a mira exito di e proyecto aki den e mirada orguyoso di e hobennan ora nan a logra nan meta, haya un trabao. Impagabel”.

Pa tuma despedida di e isla bunita aki y su hendenan amabel Hofma a sigui den Papiamento cu un poesia cu e mes a traha cu a toca curason di tur presente. Na final e ta bisa ‘Mi ta bay falta di e sonrisa amabel di e Arubiano cariñoso. Ken no por stima e isla aki, un baranca cu yama Aruba’. Un aplauso largo a sigui.

Ten Hove ta entusiasmo cu su funcion nobo. “Mi prome impresionnan di e isla aki ta tremendo, aunke cu mi mester custumbra ainda cu e trafico. E ambiente positivo ta duna mi gana di bin traha aki pa e siguiente tres añanan. E comandante nobo ta wak su dilanti un periodo yen di desafio. E kier cumpli den bon forma cu su mision di Comandante di Forsa Naval den e region Caribense. E mision ta encera percura pa e unidatnan den e region Caribense ta cla semper pa yuda den mantencion y estabilidad di orden hudicial internacional y den sostene autoridadnan civil. Cooperacion ta e palabra clave aki. “Mi ta un teamplayer. Mi no ta bay en busca di exito propio y ta habri pa tur hende”. Ten Hove a cera su discurso bisando cu e ta mira su comando mas tanto como un dedicacion na Aruba. “Pa di e forma aki continua y fortifica e bon relacion cu e isla y su hendenan”.